

E di dos club di high society

Club Caribe a pasa pa pasado



ULTIMAMENTE por constata cu tin masha Venezolano ta haci inversion na Aruba. Asina p.e. Minister di Turismo, Dangui Oduber a recientemente a duna di conoce cu un grupo di Venezolano, kendenan tin varios propiedad na Aruba, a cumpra edificio di Marina Azul.

E mas reciente inversion cu a ser haci, t'esun Venezolano, conoci pa tin un compania grandi di catering na Venezuela y ta doño tambe di un corant.

El a cumpra loke nos a conoce como Club Caribe, cu ultimo dianan esnan cu ta pasa riba caminda grandi por constata cu el a ser basha abao. E edificio aki a bay pa como 1.5 miyon florin, di cual suma cada miembro di Club Caribe a haya 13 mil florin.

Di acuerdo cu nos informacion, e inversionista Venezolano tin plannan di e.o. construi un boutique hotel, combina cu apartamento y/of condominium y un shopping-mall chiquito cu tur facilidad necesario.

Club Caribe t'e ultimo club di esnan di high society cu a ser basha abao. E prome tabata Aruba Tivoli Club. Ta den Club Caribe, e.o. tabatin e fiesta di gala durante e prome bishita di Reina Juliana y e club aki tabata conoci pa varios recepcion despues. Y no tabata keda for di celebracion di Carnaval. Tur esaki a pasa pa pasado, haciendo lugar pa otro tipo di inversion.